

全華叢書

印



純白齋類稿卷之十二

元胡助撰

郡後學胡鳳丹月樵校梓

五言排律

壽柳道傳博士廿韻

昌運通神嶽長庚應吉占仙華巍峩江浦潤漸漸
間氣鍾名世奎光燭畫檐宅心推廣大成德本沉潛
魯下傳宗遠河東問學兼修辭精以密稽古博而嚴
脫穎非常調彈冠詎久淹笑談春入坐吟諷月窺簾
考試文丕變分雍教不厭容臺儀有據清廟器無嫌

積累培良厚操持取甚廉銘章垂竹帛諡筆卻金縑
朝幘收佳譽恩波喜沛沾仲秋當吉月湛露沐威炎
桂蠹冰盤爽松醪壽斝添鸞坡方直上鳩杖未須拈
海棗香堪剝蟠桃味正甜水蒼新玉佩緗縹舊牙籤
旋逼躋華要寧容卽退恬太平資潤色里閨極榮瞻

壽吳閒宗師

瀛海仙源遠崆峒景運長真人希代出大道翼時康
教雨師門盛宗風祖德光讓流吳子國慶衍蓋公堂
慈祀精潛達迎年樂未央太玄由我老永命贊吾皇

忠孝承殊渥勲庸表異章蓬山遊縹緲弱水濟汪洋
華旦開千祀崇朝轉一陽羽儀真肅肅霞服偉煌煌
清奏聞天上黃封酌帝傍龜麟呈瑞簡龍虎衛靈塲
瑤圃羣仙集冰壺百怪藏大椿齡益茂古櫟壽彌昌
期棗仍多實蟠桃又再嘗閒閒歸衆妙一一見真常
曠劫虛無罔長生道德香玄都蕭爽地笙鶴永翱翔

壽馬伯庸學士廿韻

嶽瀆神光降乾坤爽氣浮偉人驚間出昭代獲旁求
應詔高科始揚庭大策優華登文翰屬顯擢法冠儔

天下無多士朝端第一流
抗章彈老鳳乘興狎輕鷗
耕釣蟠三楚聲名播九州
高吟淮海月清嘯石田秋
宣室趨前席承明厭舊遊
四人寧避漢二老已歸周
載筆銘鐘鼎談經侍冕旒
青宮資善翊黃屋訪洪疇
桐馬淋袍錦團龍沃賜馭
變風回大雅稽古耀前修
華旦初逢臘遐齡曷計籌
俗憐青眼顧恩重赤心投
龜息春長好虹光夜不收
玉堂真學士碧海古瀛州
仙棗香堪剝蟠桃味欲偷
壽祺齊廣老文統接韓歐

和王治書題商學士山水十韻

盛時宗翰墨學士擅丹青逸興開山水高名仰日星
樵斤空谷應漁網暮潭腥晴塢雲無迹寒崖樹有靈
幽篁奇石瘦野蔓怪花馨猿鳥林間見舟車水際停
齊梁圖作障吳蜀寫爲屏萬壑歸深院千峯列廣庭
滄波鷗泛泛空宇雁冥冥遐想巢由輩中藏隱者局

和治書春日臺中獨坐十韻

攬轡獨遲遲清朝百度宜憲綱爰自肅危坐若無思
封事通丹辰吟鞭詠素絲烏棲多好樹鳥弄幾新枝
沙軟連春草波澄解凍澌興懷金馬夕言餞碧鷄時

深院花陰合閒階栢影移芹香來燕子水暖出魚兒
白日寧虛擲青雲不負期甘泉崇報祀應待續周詩

送史秉文助教祠西嶽還家

蜀郡文章古雖庠聞望嘉放懷吞七澤歸夢繞三巴
秘祝祈民命分祠遣使華孝思寧奪席恩意許還家
海嶽皇威暢乾坤聖歷遐銜香辭紫禁負弩返青緇
令伯人方敬相如俗漫誇錦江浮竹葉玉壘漲桃花
壽尊千年會慈顏八袞加暑風清劍閣秋月上袞斜
飛雁河源遠看雲棧道賒高堂榮祿養晚節著天涯

胡安常侍郎父慶壽八十

盛世躋三壽清心養一元肖形傳洛會種德邁于門
安定新封貴中庸舊望尊菊潭澄夜月藥砌弄朝暉
大耄齊申呂高風蹈綺園枌榆崇素節橋梓沐皇恩
家慶金章綯庭趨彩袖翻珍羞嚴日愛旨酒樂春溫
水曲扶筇杖花陰駕小軒何當床下拜同姓古彌敦

元夕王參政席上賦翦燈

元夕同清賞華燈此是魁玲瓏峩鳳閣縹緲疊鸞臺
楮葉羞雕刻并刀快翦裁水紋多曲折絲縷細縈迴

一巧由心起千奇應手來紅搖驚舞袖彩散入銜杯
雲母長疑畫冰綃不染埃瑞光明百寶春色映三台
玉燭和風轉金花午夜開追陪東閣履吟咏愧無才

壽虞伯生學士廿韻

雍國光來裔岷江產世賢朝廷聲夙著館閣望推先
學問諸儒服文章四海傳楷書誠美甚古篆更蕭然
王李真齊駕韓歐可比肩持衡歸鎖院進講侍經筵
壁水聞精義蓬山玩秘篇題詩紅藥畔草制紫薇邊
竹汗成新史芸香入舊編立班金帶重下直綵旌懸

歷已三春候時方二月天長庚開壽域南極祝遐年
花院藏烟後蘭亭禊事前高明瞻斗漢雅志屬林泉
顏渥黃封酒心清白社蓮松筠宜晚節龜鶴映華顛
真率甘枯澹逍遙屏麗妍丹爐同永久鐵杖鬪清堅
前輩風流在斯文統緒延佇看升一品冠絕玉堂仙

劉仲夔御史孝廉

親喪吾自盡營葬族人兼樹栢哀何極居廬制獨嚴
夜泉臺寂寂春露草纖纖行義還瀆古科名舉孝廉
青宮趨簿領白簡肅壬檢汝頰先賢傳遺風尚有瞻

送趙宗吉西祠隴蜀

山川崇代祀有詔遣鄒枚駿極瞻西嶽華文煥上台
靈光通漢時嘉氣候秦臺望秩精誠達迎年淑景迴
函香天上至使旆日邊來馬度邛徠坂舟行灑瀕堆
劍門垂薜荔棧閣長莓苔鳩杖扶商皓斑衣舞老萊
過家多會集駐節少徘徊賦詠誇詞筆登臨騁逸才
錦江春雨足玉壘暮雲開宣室他時對皇風暢九垓

胡母李孺人挽詩

孝奉尊章久仁施德厚培治家皆懿範教子總英才

敬對一椿老芳聯五桂開萱春方有喜薤露遽生哀
采服幾年別衰麻萬里回聞喪悽六館致賻動三台
無復跳魚出唯應弔鶴來朝紳歌楚些亦足慰泉臺
新成八詠樓呈張毅甫廉使

八詠登臨地荒涼昔久堙溪山千古勝棟宇一朝新
起廢真奇事觀風得偉人赤松光世裔綉斧映朝紳
露井休文迹星壇婺女隣前楹蜂蠹蠹西浦水粼粼
天遠冥鴻羽波澄泳錦鱗闌干危倚徙蟠螭屹橫陳
秋落高梧影雲埋老樹身參差烏鳥集浩蕩白鷗馴

三洞飛仙宅雙流合劍津鶴歸華表上羊臥石泉濱
芹泮恢儒業冰壺肅吏塵勲庸銘琬琰壯麗闢荆榛
要路多名士清時少隱淪川原良可愛林壑美無垠
境曠才難盡詩工筆有神舉杯邀皓月鼓瑟轉陽春
縱目連南極馳心共北辰遊觀資治理同樂太平民

和趙可學御史試院紀事十四韻

春闈多士集五日試三塲懇懇言爲治拳拳策救荒
朝曦穿席舍殘雪擁茨牆筆落風飄忽簾垂燭燁煌
詞源寧有竭露索豈須防胸次精忠白眉間喜色黃

溫溫明玉質耿耿耀珠光對卷翻朱墨凝眸老雪霜
縱橫周禮樂馳騁漢文章側席求賢俊安民化善良
仁恩推廣大景運極延長宗伯持金鑑歐公擅玉堂
考文流電彩執法染天香我后今堯舜垂衣冠百王

送袁雪樵河間治中

漢世三公裔鴻名四海聞衣冠傳典則闕閱聚氤氳
秀挺當年少才弘史學勤槐花驗秋賦金榜炫朝昕
正議回鈞軸清風動香芸致身紫薇署拂袖青瑣熏
南邁遭炎瘴北征苦寒皸去思勒民社樂育歌泮芹

馬邑古邊障雁門今榆枌雪樵清峻極風俗美華勛
佐理煩耆彥承恩報聖君古瀛近霄漢別駕翔烟雲
綠野桑麻合黃堂風月分天官資妙畫桂子播清芬
趣召金臺上還歸潞水濱成均念同舍翰長叙斯文

王致道母壽七十

嶽神騰瑞靄婺女耀寒芒生子非凡近榮親是顯揚
斷機齊孟母躍鯉繼王祥史館明褒貶成均化善良
閼宮歌實實泮水頌洋洋燕喜開東魯忘憂樹北堂
高科儒業遠介福壽源長鸞誥天花燦魚軒象服光

七旬初度日三月正春陽翠釜珍羞味黃封旨酒香
聰明如少壯步履更輕強姻友歡同會門生迭舉觴
遐齡岡翠翠真節栢蒼蒼五福膺全具兒孫笏滿牀
遊赤松宮

真境玄冬際空山靜窈然舊遊如隔世清坐欲通仙
蓬島虛無地桃源小有天寒雲依竹屋晴雪漲丹泉
林影日光薄梅花春意先盤桓松鶴外舒嘯石羊邊
未暇窺龍洞何由訪鹿田山人朝覓句羽士夜談玄

酬和古律詩廿四韻

并序

僕歸自京師承子晦翰製惠書見賀學識超然追
古人而從之殊增降歎日者伏謁辱款盛筵眷意
綢繆益悅情話且又贈遺古律詩廿四韻大音希
聲寵光行李異時中朝諸公見之亦當爲之擊節
也輒次韻奉答甚愧續貂幸裁正焉胡助頓首再
拜

乾坤森萬象一氣實綱維屬此文風盛方當世運熙
青山玫瑰瑛白水照摩尼土樂吳尊美年荒魯酒醪
達才猶昔日藏器諒需時瑚璉周宗廟衣冠漢羽儀

喜因趨燕寢暫得脫塵羈文翰功深著鄉閭德厚施
遠懷纔略布妙語數相遺燕客華觴集娛親彩服奇
乘軒憐野質招隱慕幽姿孰謂淹槃澗行看貢禮闈
感君崇道義愧我拙言辭磨琢資良友溫恭本聖師
克勤逾澹泊加禮益操持雲軌長虞覆天閑每斥嘶
萱堂春意永竹徑歲寒期西峴霜空壑南溪雨漲堤
古心稽典籍逸興寄園池習俗行誇疾隨時論稍卑
椒盤春獻頌蓮炬夜催詞博學端成務愚言敢儗卮
行藏俱有合用舍孰非宜年妙才華富飛騰豈厭遲

[Faint vertical text columns, likely bleed-through from the reverse side of the page]

純白齋類稿卷之十三

元胡助撰

郡後學胡鳳丹月樵校梓

五言絕句

白雲

片片白於雪
山人共隱居
豈無作霖意
太空時一舒

石鼓嶺

經過石鼓嶺
不見石鼓文
兩澗流寒玉
半山生白雲

黃秋江耕釣山房十詠

清江釣月

江月澄秋色垂釣沙岸邊得魚固可喜無魚亦欣然
空谷耕雲

農事不可緩躬耕以養親隱居雲谷裏老作太平民
蒼峯卓筆

孤峯卓毛錐何啻萬鈞力誰能蘸秋江顛草書空碧
碧巘開屏

神工琢方玉爲障紅塵路翠屏生晚寒白鳥忽飛度
楓林巢鶴

蕭蕭楓樹林上有仙鶴巢獨宿白雲遠數聲秋月高

雪澗浮龜

激湍浮石龜頑若不知事澗底得高年殊勝江湖使

峻嶺扶車

行險虞傾覆居高慮易非上車挽不進下車去如飛

圓岡揭斗

山脉應天象壁星布圓岡肅容靜相對拱北心不忘

雙溪合璧

寶劍千年合山輝神氣通深清環釣石餘潤作年豐

古寺垂虹

空山出清磬蕭寺隱林端掃葉僧歸後夕陽橋影寒

希夷像

肚皮包太極鼻息應黃鍾天下事已定先生睡得濃

山水小畫五首

小山如虎踞大山似龍蟠草堂人已出蕙帳生春寒
春香花泛泛水渺山重重漁艇時來往桃源有路通
結廬水石會高居把釣人前峯春雨足一派垂天紳
古寺雲峯頂微茫一徑開時逢林下客興盡抱琴回
茅棟臨松壑飛流不厭看何勞揮白羽長夏自生寒

劉伶像

一鋪埋身計相隨入醉鄉形骸雖放浪生死未能忘

子昂枯木竹石

幽篁微有韻枯木寒無枝石生方傲兀歲晏以爲期

秋晚小景

茅宇清溪曲秋風老樹疎空中羣雁過知有北來書

蘆雁四詠

飛鳴宿食

肅羽遵寒渚渡江蘆葉黃誰云南去遠不敢過衡陽
萬里西風急送書時一聲從教驚客夢可待主人涼

沙汀棲處穩夜漏有奴看月暗蘆花白一身秋夢寒
飲啄殊自得水田梁稻秋寧因謀一飽失卻網羅憂

新涼二首

夜來牕戶涼一枕聽秋雨曉起絕飛埃門前有流水
雨將殘暑去風送新涼至安得歸夢成夜長愁不寐

勸兄弟十首

田氏好兄弟初焉念少差一朝仍會合荆樹再開花
鄴下然萁句淮南布粟歌相煎容不得奈爾二人何
勿苦毫釐較當思手足親丁鴻與劉愷讓國是何人

鴻雁天邊過鵲鴿原上飛尋聲還顧影次序不相違
父慈子必孝兄友弟須恭倘使誠心在如何不感通
連床聽夜雨長枕共姜衾棗萼相輝映何由外侮侵
金昆與玉季和樂奏埙篪氣象自然別澗風復古詩
生來同一氣兄弟是天倫祇要長和睦休論富與貧
友愛言無間從教耳屬垣恬愉崇遜讓寬厚福之源
古有難兄弟今無好弟兄何由風俗厚凡百近人情

越上寶林寺八詠

飛來峯

寶林從何來飛空錫同住天風吹海濤長恐復飛去

應天塔

浮圖成再世業岌高人雲妙應人天果鈴音上界聞

靈鰻井

巖穴如深井潛潤通海脉靈鰻久蜿蜒歲事時有獲

大布衲

清涼大布衲七帝師道德流傳五百年未減鍼綫迹

羅漢泉

應真曾卓錫百尺井泉深汲取天人供泓澄印佛心

古鐵鉢

鐵鉢生古色曾經飯胡麻
黃龍此降服更長碧蓮花
深竹堂

禪宮庭宇靜深翠萬竿竹
忽悟瓦礫聲香巖道機熟
盤翠軒

獨擅月中秀軒牕四面出
紅塵飛不到長其白雲閑
除夕

今年盡今日明日是明年
客况蕭條處春寒雪後天
大能仁寺五詠

支遁室

支遁開山祖千年古道場坐看秦望碧門對鏡湖光
立度檜

許公手親植上有蒼苔封應悟無生話蒼然化老龍
天鏡閣

凌虛高閣迥一鑑懸秋空山河與大地盡在光明中
傲雪軒

松竹持高節清香獨讓梅歲寒同傲雪風月更悠哉
見月亭

夜夜見明月殘經可了看半牕橫塔影玉露三更寒

孔子泣麟圖

麟爲聖人出聖人爲麟泣見獲何不祥春秋成絕筆
布袋和尚

一筇挑布袋萬物此俱收開口嬉嬉笑人生枉自愁
雨水竹

楚雲飛不起翠羽溼低垂南望九疑遠湘妃泣舜時
畫虎二首

踞坐視耿耿空山將落日一嘯風滿林獸驚不敢出

橫行負嶠坐風林欲暮天威猛服羣獸孰敢攫其前

尖帽山

山似高簷帽青尖插晚空何人堪戴取付與筆頭翁

彈琴峽

白石似琴身流水似琴絃阿誰彈此曲遺音千萬年

仙人枕

石作仙人枕枕邊流水聲借君眠一覺神爽到蓬瀛

白海

雲淡青蕪遠風高白海寒君王圍獵處人道近長安

隱趣園八詠

君子池

池上藕花開香從太極來亭亭清淨觀君子日徘徊

待月壇

天遠雲歸早山高月上遲夜坐發孤詠秋風生桂枝

蜀錦屏

濯錦爲屏障紅妝擁萬妃試看春睡足何羨買臣歸

天香臺

三月韶華盛名花傾國人何期真率會同賞洛陽春

香雪壁

醱醱春意好百尺走條枚壁立堆香雪風流入酒盃

晚香徑

彭澤歸來後東籬菊正黃秋光無限興晚節有餘香

竹澗亭

竹遶茅亭外泉流石澗中一天秋月夜千載隱君風

歲寒亭

松竹如佳士梅花更典刑歲寒千古意笑指鹿峯青

附六言絕句

稽鍊師秋山小景二首

緱嶺鳳笙明月茂陵仙掌秋風雲臥楚山飄桂練靜
吳江落楓

林下手招歸鶴水邊目送飛鴻莫道秋山是畫分明
身在其中

羣魚龜蟹圖二首

羨爾水鄉三物濠梁之樂誰同慎勿橫戈沙上正須
曳尾泥中

風味獨傾郭索吉凶莫問波臣便當拍浮湖海長作

龜魚主人

虎溪三笑圖二首

東林一段公案送客不過虎溪今日爲誰破戒欣然
拍手分攜

陸道士靜兀兀陶淵明醉如泥笑殺遠公相送何曾
踏着虎溪

北山不老泉

千載有懷慈母一泓不老寒泉欲窮源而莫盡竟坐
石以安禪

純白齋類稿卷之十四

元胡助撰

郡後學胡鳳丹月樵校梓

七言絕句

安山見王繼學侍御

綠暗園林杏子熟
安山泊船端午時
南歸喜見王侍御
薰風入座談新詩

商學士山水

雨斷雲林溼翠幢
漁舟一葉釣清江
好山秀水商公筆
付與幽人臥北牕

蘇李祖別圖

持節生還海上身
酒酣泣盡別愁新
河梁分手天南
北千古長憐異域人

羅稚川山水

稚川山水足幽奇
點綴分明似郭熙
何事舟人歸意
速風吹溪雨欲來時

戲詠鶴

白鶴翩躚日日來
道人庭宇啄莓苔
祇愁煉得丹成
後騎上青天去不迴

桐江舟中

潮送歸舟過浙東
嚴陵灘下一帆風
桐江秋色真堪
畫回首釣臺烟雨中

柯敬仲枯木竹石

瀟灑幽篁不受塵
千年枯木篆書文
揮毫鶻落清新
意不減湖州古墨君

登舟口號

舉家送我上扁舟
一路溪山憶舊遊
小漿如飛人漸
遠無窮離恨懶回頭

用柳道傳韻題天王講主墨梅

妙入毫端老更妍
河東向落簡齋邊
天王祠下春風
面時見飛花雨法筵

贈懷空上人

卓錫爲庵了上乘
高風孤絕護山靈
我來試叩祖師
意直指芙蓉一朵青

草堂歸來圖

草堂雲水靜含暉
荆樹花梢掛衲衣
卓錫有聲慈母
喜萬回方向北山歸

錢氏孝感紫芝圖

孝子當年泣血時
蓼莪一詠一回悲
冰魚冬笋何嗟
及瑞應猶多見紫芝

東坡書三馬贊真蹟

圖成天馬歸何處
墨妙辭雄耐久看
當日儀曹五花
判他年遷客一忠肝

錢清道中

斜風細雨過西興
越上山光見未曾
夜宿錢清愁不
寐可憐春盡冷如冰

李息齋墨竹

薊邱老息竹傳神密葉寒梢不受塵相對碧牕風日
靜嗒然疑是古仙人

戲作東門竹枝詞五首

東門歲晚竹枝歌白髮無情奈老何古意猶存風俗
厚南人不似北人多

病卒攜筐拾墮薪東門稍僻少車塵久從叫佛樓邊
住慣見深眸高鼻人

酒力微微夢易回地鑪宿火已成灰飛霜帶月寒駝

吼知有氈車直北來

寒林不動靜無風小酌瓜薑面輒紅
晚向東門回首處西山正在夕陽中

馬通火軟穴居溫不管狂飈縞帶翻
舊歲闌珊新歲近短轅何用出東門

僧元卿御史送米

曝背晴軒柳影疎履穿衣弊且安居
朝來御史分清俸飽飯紅陳讀古書

得家書

老子飄飄出岫雲從教二息自持門忽逢驛使平安
報更喜秋來得一孫

送道士楊一可歸儒養母

劍門春老畫啼鵲負米還家草太玄若識孔眀無異
趣人間孝子卽神仙

墨蘭

翠袖瑤華浥露香所思渺渺在三湘九疑日暮碧雲
合空谷無人亦自芳

畫猿

長臂黑猿棲驚嶺攀藤接果捷於風冷泉亭上僧歸
後長嘯一聲明月中

鑄橘樓

商嶺老人何處藏結樓賓日攬秋光金烏飛出東海
水鑄作洞庭千樹黃

郭天錫山水

危峰千仞翠蒼蒼彷彿匡廬有草堂聞道山人徵不
起紫芝春暖白雲香

子昂秋岸牧牛圖

野岸秋風木葉稀
兩三穀鯨度荒陂
玉堂學士歸田興
寫出山溪放牧時

懷遠五首

朝投諫書夕遠竄
詩史誣訕亦南遷
玉人自昔宜烟瘴
文采風流今謫仙

中書落筆萬人驚
海外爲文更老成
若使青氈還舊物
也知造化忌聲名

停車綠葉暗枕榔
荔子蕉花取意嘗
何日賜環誇北客
西牕剪燭話南荒

醉墨留題發興新
遐方景勝必因人
零陵山水聞天下
亦是當年遇逐臣
起居服食異中原
瘴海茫茫何處村
愧我真成翟公客
不能一往候寒溫

謝饒士悅惠楮衾二首

漂楮爲衾雪色鮮
軟於冬絹煖於綿
詩人持贈師清儉
穩向寒齋夜獨眠

麥光如練瑩無瑕
蜀錦吳綾未足誇
煖入詩脾長熟睡
夢成踏雪看梅花

朝賀退赴南城試院三首

天子龍飛朝會罷
卽開貢院到南城
燕臺桂樹秋風老
奎壁光芒五夜明

簾外良勞小試官
棘闈列卒謹防閑
夜深危坐看騰卷
蠟炬燒殘筆吏寒

文場戰藝似銜枚
學術源源筆下來
不負皇家圖治意
端從鄉薦得人才

題七賢過寒林

踏雪崎嶇有底忙
僕夫寒窘度林塘
他時張蓋紅塵

陌卻憶黃鑪舊酒香

值初度

塵滿衣巾好宦情
玉堂閒暇得虛名
侍祠太室清宵短
不記今朝是我生

盧溝南道上三首

彰義門前楊柳陰
過街塔畔井泉深
行人飲馬向南去
歷歷穹碑好墓林

柱頭獅子巧雕鏤
橋下湯湯走濁流
五月燕山日如火
寫碑兩度過盧溝

翁仲新阡又一時忠奸百世託雄辭
史官清暇知何補奉勅來書買傳碑

上京紀行見玉泉山下荷花

西山咫尺玉泉清無數藕花香氣生
立馬岸邊看不足卻疑五月過臨平

榆林

倦客出關仍畏暑居庸回首暮雲深
青山環合勢雄抱不見舊時榆樹林

槍竿嶺二首

九折盤紆過客愁
適當載筆扈宸游
長年見說槍竿嶺
今日身親到上頭
下馬徐徐陟澗岡
山風微動十分涼
桑乾嶺上一回首
何處雲飛是故鄉

再賦李老谷

李老谷中聞杜鵑
江南遊子不歸田
利名引得滔滔去
竟渡灤河朝日邊

過桓州

陰雲慘淡滿天秋
馬上龍鍾擁毳裘
漸近灤京涼又

別斜風細雨過桓州

題望都鋪

坡陀散漫草茸茸地接烏桓古塞風仰止神京三十
里樓臺縹緲碧雲中

灤陽雜詠十首

帝業龍興復古初穹窿帳幄倚空虛年年清暑大安
閣巡筆山川太史書

綠闌青草玉花驄馴鹿遊眠殿閣東西梵祝釐環地
坐瞳矐初日曉旗風

西清學士草黃麻閣老承恩扈翠華昨夜司天臺上
望文章光燄照龍沙

小西門外草漫漫白露垂珠午未乾沙漠崢嶸車馬
道半空秋影鐵幡竿

板屋松烟染素衣天街暑雨沒青泥夜來沙磧秋風
起鳴鏑雲間白雁低

御天門前聞詔書驛馬如飛到大都九州四海服訓
誥萬年天子固皇圖

斗北高寒無點暑舉頭正見七星文玉堂近與琳宮

接清夜步虛聲最聞

朝來雨過黑山雲白眼泉生水草新長夏蚊蠅俱掃
迹葡萄馬潼醉南人

萬騎橐鞬列旆旌周廬嚴肅駕將興帳前月色如霜
白曉汲灤河窟裏冰

玉堂視草屋三間盡日鼇峰相對閑身遇太平鈴索
盡題名篆畢又南還

偶題

頭上陰雲如潑墨堦前白雨似跳珠秋來日日風雷

作併入灤陽八景圖

宿牛羣頭

蕎麥花開草木枯沙頭雨過茁蘑菇牧童拾得滿筐
子賣與行人供晚廚

御花園

朱扉金鎖綠如雲雨露恩光草木新若識九重臨幸
意花時人世一般春

看雲步虛詞壽吳宗師十首

南極光華世壽昌羽衣滿袖是天香蓬萊殿上神仙

客長見紅雲擁玉皇

青霄萬里出瓊英神運無方孰可名魯觀朝來書瑞
應一陽生處卽長生

冥冥雲漢鶴飛高密勿真藏豈用勞燕坐空同千百
歲丹霞萬樹熟蟠桃

真人羽化有還丹寓意看雲閑更閑舒卷從時皆道
妙寧分天上與人間

萬象陰陽一氣分要從靜處見天君太虛同體無凝
滯始識吾身是白雲

動靜無端長又消妙觀元化共逍遙文章準易傳千
古唯有青城一老樵

手招歸鶴同棲處目送飛鴻見起時幾度塵寰作霖
雨閑心祇有老天知

山林歸夢是耶非海棗如瓜別有期看盡浮空千萬
態不知倚杖立多時

一片閑雲孰與儔長空湛碧自周遊星移物換人間
世倒影寒潭萬古秋

雲錦溪山紫翠圍仙宮縹緲護玄扉林梢片片飛來

溼知是從龍行雨歸

柯敬中竹石枯木

山石蒼蒼老竹修穢材一派落丹邱虛牕晝靜無人
到風動天壇碧玉秋

訪王用亨丹房又題墨梅二首

道人危坐碧牕紗客至呼童旋煮茶深院日長無一
事薰風開遍石榴花

京洛相逢塵滿面孤山老樹日蕭疎何時歸去茅簷
底瘦影橫牕夜讀書

純白齋類稿卷之十五

元胡助撰

同郡後學胡鳳丹月樵校梓

七言絕句

題宋理宗御札賜王寔後

蹙國防河事可知
錢塘綴息強支持
權臣債師無庸
責天命方開混一基

又

穆陵訓敕耿遺珠
盛世足徵文獻餘
王守宜登良將
傳孫會上送史官書

九日同晉卿攜酒訪士悅二首

菊花時節蟹螯肥
風起天街木葉飛
長記九重重九日
都人瞻望翠華歸

秋風紗帽客京華
幾度重陽不在家
清俸尙堪供一醉
與君隨意看黃花

題秋粟銀鼠卷

銀鼠何如永某氏
皮毛如雪秋正肥
黃粟原頭慣偷食
不知捕作貴人衣

題蔡君謨家書

家問勤勤一紙書榻前奏疏此權輿直將忠孝貽千古不獨聲名耀里閭

又

一節功名耐久看奉親報國寸心丹當時閩產如公輩尙得輸忠作諫官

懷李亭

何人懷李弔仙靈千載春風醉不醒吐出驪珠二十顆敬亭山色更青青

祠山張廟

祠山古木庇宮庭傳說埋藏別有靈不見題詩羅處
士將軍對立鐵衣青

春雨

京城春雨似江南客况蕭條苦不堪又報中臺除白
下諸公袞袞赴朝參

和張毅夫右司燕集

階藥老紅春意靜牕筠新綠夏陰閑西垣燕集刑期
措天下安寧似泰山

相府羣英佐治安獻酬尊俎樂餘閑留司整暇時延

佇太液波涵萬歲山

折枝來禽

寫生沙果似妖姝映日紅腮霧露餘想見江南此時
景薰風池館正臨書

聽松樓

小樓月白奏笙簫數樹長松倚碧霄夜半忽驚風雨
至不須更聽浙江潮

江鄉捕魚圖

蒼崖老樹日蕭蕭一片秋光水動搖漁父滿簪頭似

雪兒孫歡喜白魚跳

又詠

中原文物說金人二百年間墨尙新何限江湖漁者
樂至今展卷動朝紳

遊李氏園

小舫清遊一日閑林亭高處倚闌干西湖前面孤山
後水態雲容不厭看

湖山堂

綠樹殘紅夏氣清湖山樓觀雨初晴水雲陰裏笙歌

起多少遊人醉太平

六一泉

湖上興懷二百年文章太守玉堂仙
我來醉倚長松下三酌孤山六一泉

過瓜洲

去年六月過瓜洲今夏還來此繫舟
堪笑在家能幾日一來一往白人頭

羅稚川雪景

獨釣寒江似凍蠅五樓千尺挂枯藤
山陰道上無行

迹林外人家雪滿簷

赤壁圖

扁舟赤壁興飄然白露橫江水接天三國英雄渺何
許千秋風月屬坡仙

又

山高月小水聲聞二客從遊酒易醺孤鶴橫江夜將
半羽衣入夢揖予言

湖學感興四首

斯文行世古猶今安定先生教育深湖學四齋天下

式先將經義淑人心

經殘教弛尙虛文風俗何由使再淳進德明明貴天爵豈圖溫飽似庸人

漢唐殘刻有餘妍文定雄辭百世傳明善固非求墨妙蔡奸蘇節自昭然

芹香茗水碧於藍六籍醕醲味正酣格物工夫精治事莫教俗吏笑清談

戲呈黃晉卿博士

壁水西廳國子師天街遇雨獨歸遲豈知不與朝參

者正是微吟睡足時

望仙都

清溪白石樹扶疎
山骨蒼蒼潤不枯
無數花流春水
出行人指點近仙都

嶺上翛然一拄筇
千巖萬壑縉雲東
洞天可望不可
到石笋峨峨春雨中

過馮公嶺

披雲橋上馮公嶺
借問何由嶺姓馮
人道馮公有遺
愛故將危嶺號馮公

又題馮公嶺

肩輿咿嘍畫圖間
峭壁攢峰碧玉環
上到嶺頭一回
首不知身歷萬重山

追和洞賓留題玄妙觀蕉池二首

山房不見道人回
池上蕉花幾度開
午夜雲歸秋月
白題詩好待我重來

一氣元爲萬物胎
誰將混沌鑿分開
斷崖水石幽深
處時有仙人自去來

車上

山川奇氣子長文今日輿圖古未聞行盡河流上車
去北來喜見橐駝羣

九日書寓居壁

隨寓書齋也自奇主家種菊似東籬黃花爛熳西風
冷時向牕間得一窺

又詠

破帽飄飄老孟嘉驚逢重九客京華故園今日知誰
賞卻傍人門看菊花

鐵木迭兒丞相斷碑石二首

昔見忠賢鑄黨籍邇聞奸相立勲碑雷霆震擊分邪
正唯有蒼天不可欺

立馬東風感慨生桑田無定幾枯榮權門回首如冰
冷春草離離斷石橫

眉菴爲伯生賦三首

正色騰騰結喜緣菴中老子卽蓬仙長豪垂雪如羅
漢小住人間五百年

腳踏實來應不皺眼生花後卻成攢乾坤清趣無人
賞山月半輪江影寒

取名廉甚道函三居上無功或爾慚
千古文章宗蜀郡眉山今日屬眉菴

班姬題扇

漢苑秋風太液波承恩多處怨還多
欲將心事書絢扇時有炎涼可奈何

徐孝子

剖股頻頻母疾瘳徐生孝行與神謀
聖人垂訓雖殊此叔世間風實少儔

鷺鷥野景

溪壑心情白雪衣
聯拳靜立柳陰微
魚蝦啄盡江南岸
卻上青天自在飛

寒齋漫成二首

曠野蕭條河水邊
小齋獨坐對殘編
去年憐我山居索
今比山居更可憐

月影橫牕塞雁鳴
孤眠客子若爲情
夜寒酒醒夢顛倒
或在家山或在京

漫興二首

冷官蕭散獨徘徊
歲宴無錢買酒杯
非索薦章須廩

粟半年銅印不曾開

大風纔定掃塵埃
糴米長鬚久未回
怪得敲門聲頗
亟不知恰有貴人來

瓊花

碧樹瓊英護赤闌
仙姿綽約怯春寒
楊州風物猶堪
畫后土祠前幾度看

題涿州驛

秋闈再闈喜文明
猶記河南舊驛程
漸愧白頭留滯
客又從東魯試諸生

題崔鷓龍圖家傳二首

是非顛倒指忠邪
章蔡登庸理國家
向使公言真見
用兩宮未必狩龍沙

龍圖直氣邁朱雲
回首東都陷虜塵
南渡百年文物
盛似茲章疏幾何人

南歸舟中雜興七首

青青河畔野花開
獨飲香醪一兩杯
枕上有時春夢
覺遙聞天際櫓聲來

十年不改舊官名
幾度南歸又北征
史館重來頭更

白翰林風月有餘清

紅杏園林草漸青
牛羊駝馬亂沙汀
舟行飽飯魚羹

美落日風吹野水腥

快意風帆去路遙
水聲浩浩似江濤
五更歸夢錢塘

上睡起不知春日高

連日南風送北船
南船牽挽不能前
一朝也解北風

轉說與南船莫怨天

臨水消愁看落花
賸拚一月到金華
故山歸日應初

夏綠樹濃陰有幾家

雙飛白鷺過沙頭
隔岸人家草樹幽
歸向江南花落盡
一篷烟雨載春愁

初度口號

今年初度喜還家
滿眼兒孫語笑譁
白髮難酬恩罔極
明年依舊在京華

用王玉成韻題鮮于伯我五郡紀行詩二首

古錦奚囊曉出關
春歸綠野有餘閑
老農不識皇華使
按轡來看海上山

幾迴下馬扣柴關
坐石題詩意自閑
明越天台溫處

道白雲流水萬重山

瓊花

素質冰綃映碧空
天香夜染蕊珠宮
此花不比凡花
謝春盡仍歸闥苑中

題泮東徐原明甫山水圖

秋老石根松籟鳴
溪橋林澗少人行
水寒不見垂綸
老惟有歸舟載月明

純白齋類稿卷之十六

元胡助撰

郡後學胡鳳丹月樵校梓

七言絕句

元旦卽事二首

再入詞林兩度春衣冠元會物華新青衫皓首江南
客亦是彤庭班末人

新年佳氣滿皇州南雁回時春水流白髮史官幾七
十上章告老覓歸舟

墨雨竹

江浦娟娟雨葉垂
兩竿倚玉鳳棲枝
天寒翠袖春風
澁恰似湘妃泣舜時

寓舍偶題二首

華軒清暑思從容
朝市山林蟻夢同
深巷絕無車馬
到午牕一枕綠槐風

僦得幽居慰客情
槐陰滿地暑風清
見人抱甕治蔬
圃卻恨歸田賦未成

宿貢秦甫書齋二首

歲晚天寒其一觴
書齋留宿話文章
懸知二妙連床

樂翰苑瀛州日月長

京華幾載托交深
白髮蕭蕭已滿簪
永夜書囊談未了
擁衾彷彿夢雲林

夏日寓僧房有感三首

鶴姿豈必愛乘軒
觸械寧容老灌園
聞道朝端求治切
江南民瘼可能言

涼生塔院竹風吹
老翠摩空峴色奇
午睡覺來成獨坐
時看一卷柳州詩

然竹煮茶消永日
解衣坐石受清風
一塵不動天機

寂萬法何歸覺性空

正月三日王仲能載酒同飲湖山堂二首

鳳沼新春休沐日
脊郎邀我作遨頭
也知北客三年
仕不及西湖半日遊

小舫清尊早過湖
湖山堂上興何如
洞簫吹徹歌聲
緩春雪微微點翠裾

過陵州

御河漾漾本蘭舟
春盡飛花送客愁
何事驅馳南又
北三年三度過陵州

初度遊西山

水樹涼生五月秋，河邊駐馬看龍舟。
幾年初度京華客，今日西山特地遊。

溪山過雨圖

從意元暉伯仲間，諸峰過雨白雲閑。
江南林谷真如此，中有高人不出山。

暮冬感懷

京城風雪歲將徂，廩粟朝朝換酒壺。
附火鴟蹲身懶動，豈堪弄筆畫胡蘆。

又題

朝家實錄幾回編尸素長慚費俸錢莫把文章修舊
史恐妨歸老臥林泉

初度偶題

加我三年七十人劬勞思報志空勤行抽手板歸田
里遠碧山中有白雲

良鄉道中

秋雨泥途有底忙考文三度過良鄉燕南自古多奇
士拔取弘才作棟梁

過涿州

歸騎翩翩似水流
泥乾路穩更無憂
愧予忝薦中原士
幾度西風過涿州

水仙花

南浦飛雲見洛神
凌波微步不生塵
梅兄礬弟雖同趣
一種風流別是春

沃青閣

南塔前頭高閣上
山光渾似沃洲青
夜來飛雨穿牕入
翠溼華巖一卷經

追和荆公留題龍泉二首

千年神物疑常在一勺寒泉永不乾
海內青苗自枯槁蒼生空望起龍蟠

山石靈源潤不枯清甘爲我滌疏麤
近來莫訝留題少曾有金陵一句無

東湖十詠

東湖秋月

東湖者純白老人世家之所居也

明月高懸萬古愁東湖碧水一天秋
倦遊老子歸來

後夜夜清光照白頭

巖山蒼翠

巖山者逸老堂南望諸峰是也地連永康俗名十二巖山多異跡

十二巖巒列翠屏人傳洞壑有仙靈朝雲暮雨尋常事萬古巫山一樣青

南浦春流

南浦者純白老人家前之水也其源出大盆山春漲瀾漫極可觀也

沙邊遙見木蘭舟淺渚清波漾白鷗三月盆山春水發滔天雪浪大江流

禪悅白雲

禪悅者白衣大士道場也昔延名僧居之今廢昔時老衲滿禪關幾度殘經帶月看今日荒涼僧去盡水牕空鎖白雲寒

陳莊水亭

陳莊者東陽宅仁氏倉廩也因起小亭臨于池上一境可觀

黃雲萬頃覆西疇高臥元龍百尺樓未必催租真敗
興自緣人物少風流

葛圃花竹

葛圃者界軒先生故居也其孫夢賢善葺理花竹
可愛

仙翁舊圃藥苗肥竹徑幽深白板扉春酒釀成因醉
客海棠花下倩扶歸

秋堂湖石

秋堂者純白老人從諸孫壽朋之廬也昔買喬氏

太湖石運至西園真奇觀也

太湖奇石削崔嵬壯觀秋堂信偉哉米老見之當下

拜百夫輿自孔山來

秀野沙洲

秀野者純白老人舊園池也盡壞于狂瀾近年水

還故道沙漲復洲今開為田矣

清泉白石化園池沙漲泥淤復舊基滄海桑田知幾

變故宮禾黍正離離

西邱夕照

西邱者東湖之西小邱塢也自昔農人邱氏世居
竹籬茅舍雞鳴犬吠相聞有古風焉

禾黍雞豚不厭貧耕桑世業古風存夕陽掛樹秋光
老樵擔參差下白雲

五度朝暉

五度者逸老堂東北望見大山是也不知五度之
名何說其下居民多富者

大小崑峩五度峰朝暉暮靄變無窮山紅澗碧人家
好簫鼓蔡祠歲屢豐

子猷訪戴

玉嶂冰溪雪後天
扁舟孤詠興飄然
當時若見戴安
道那得風流千古傳

雪牕墨蘭

空山窈窕泣湘靈
回首芳洲杜若青
禪老揮毫真善
幻光風吹得楚魂醒

古松

庭前挺立歲寒心
千尺蒼髯半畝陰
下有茯苓成琥珀
臥聽風雨老龍吟

余景山枯木

千年枯木不知春
鐵鎖珊瑚古篆文
前夜太陰雷雨
黑老龍蛻骨越江墳

庚寅歲旦

元日春回已一旬
老夫就養客吳門
新年七十又三
歲後飲屠蘇望白雲

隱趣閑步二首

野人生計在桑麻
松竹清陰處士家
山北山南雪消
盡後園日日看春花

萬物生生造化功園池佳趣幾人同風輕日煖唐虞

世柳色花香杖履中

園賦附卷二首

效翁始數蕪望白雲

六日春明日一會去夫旅養容吳門條平士十七

公與寅刻且

志步銷德骨城乃賦

下爭林木不映春澗陰脈脈古篆文簡文太

余景山林木